

四庫全書

集部

欽定四庫全書

集部

道鄉集卷二

詳校官庶吉士臣吳烜

侍讀臣孫球覆勘

總校官中書臣朱鈐

校對官典簿臣劉景岳

謄錄監生臣劉人鶴

欽定四庫全書

集部三

道鄉集

別集類二 宋

提要

臣等謹案道鄉集四十卷宋鄒浩撰浩字志
完常州晉陵人元豐五年進士官至直龍圖
閣贈寶文閣學士謚曰忠事跡具宋史本傳
此集乃其子柄栩所輯凡詩十四卷文二十
六卷李綱嘗為之序此本失載東都事畧載

浩集三十卷疑此亦後人所分也浩於元符
二年以上疏諫立劉后編管新州當時已焚
燬其稿徽宗初蔡京重理浩罪求其疏不得
乃偽作浩疏宣示之今集中具載原疏盖自
徽宗實錄浩傳中採出者又集載疏共四首
而李燾長編內尚有元符元年論執政大臣
不和一疏不見集中又論章惇凡四疏集亦
祇載其三而高俅轉官一制乃存而不刪盖

編類之時蒐采未備去取亦未盡當也柄等
鏤板宋末已燬明成化間其裔孫鄒量始得
內閣抄本萬歷中錢塘令鄒忠允亦浩之裔
乃再刊行之王士禎居易錄稱其古詩似白
居易律詩似葉夢得又稱其受學程門而特
嗜禪理詩文多宗門語其括蒼易傳序服膺
荆舒之學亦駁而不醇夫浩之大節可謂不
愧師門矣語言文字小小異同未足為累蓋

所學在此不在彼也以是吹求是亦不揣其
本矣乾隆四十三年四月恭校上

總纂官

臣紀昀

陸錫熊

孫士毅

總校官

臣陸

費

墀

欽定四庫全書

道鄉集卷一

宋 鄒浩 撰

古賦

憤古賦

并序

余讀離騷見屈平以忠不容而卒葬於魚龍之腹
也憤然傷之故爲此賦

嗚呼屈平之忠曷不足以悟懷襄兮
存困乎讒口之嗷
嗷流落江湖不堪其憔悴兮
曾舊履不貶損乎一毫憤

憑中溢不可遏以復為無物兮操觚進牘遂大肆乎離
騷博萬殊之動植而擇以比興兮匪故角勝負而為此
怛怛或超然曠蕩乎四方上下之表若無以取信兮要
其心之所存則惟冀君之我交後世有志之士覽斯文
而想風采兮猶慨然永歎又繼之號咷以此較彼輕重
固有在兮如之何不從彭咸而投波濤人孰不有一死
兮或重逾泰山或輕愧鴻毛惟平之死於忠兮使來者
自悔其貪叨歷上古以稽君臣之盛兮邈鮮儷乎重華

之朝稷契臯夔更相汲引以比肩於巖廊之上兮北之
幽州南之崇山不聞流鯁直而放英豪聚精會神如一
人兮成功獨巍巍乎其高夫何世而不生靳尚兮其消
其長係人君之孰褒以唐太宗之賢卓犖近代兮於鄭
公之既沒也停昏仆碑且不念其勤勞况本非其擬重
以難明易聽之說兮宜其君臣之盛亘千祀而一遭幸
大明之燭無疆兮間不能以容刀戒百鍊之剛化而繞
指兮雖至陋也願初終乎所操

四栢賦并序

卷一

廣陵學官廳嘗為夫子廟今所居之堂即其殿也庭植四栢皆凜凜合抱愛之而賦云

瞻廣陵之寂歷兮直高堂之崢嶸
薙蔓草以如拭兮偉四栢之亭亭
葉委蓋以固覆兮幹聳翠以上征
根盤薄而石老兮皮皴皴以龍驚
儼相揖以成列兮何意氣之不可
凌豈商山逸叟見邀於子房兮將
以翼儲君而經營抑匡廬勝友自
得於蓮社兮方且傲當世而潔清
想

昔日之巍然廣殿兮對先聖以交榮如子路曾皙冉有
公西華之侍坐兮垂紳端拱各控其素志之誠嗚呼余
德至陋繆膺教職獲與栢而相植如親炙夫盛德講習
之餘將迎之隙既弗嗜於盃盤又無忘於射奕必往來
栢陰吟哦其側綿日月以居多豁聰明而有得其朝暮
也藹瑞露以冥冥駐歸雲而凝碧其四時也謝羣芳之
爭妍憇薰風而暑釋篩蟾光之十分封雪霜而玉鑠若
乃瓊花兮一本芍藥兮千畦蕙蘭馥郁乎亭檻錦綺焜

煌乎塗泥上由刺史爰逮黔黎咸擇地而置酒紛踵繼
以車馳曾此栢之不顧分其青青固自若也豈以此自
少而遂衰及夫時運遄往木帝無為驟雨滂沱以滌蕩
狂飈奔騰而折摧昔蕃鮮兮何在今寂寞兮空枝使當
年之好事慘搔首以興悲獨此栢之不變兮其青青固
自若也亦豈以此自多而增竒嗚呼栢之所以為栢兮
其常德若茲僕幸得之而深兮勝老馬以為師允蹈賢
聖所期於學者死而後已兮肯以窮達異其毫釐庶幾

無愧乎栢之常德兮不為君子之棄而小人之歸

古詩

秋蠅

秋風快如刀着木木欲折蕃鮮轉淒淒入眼無一悅青
蠅獨何為飛鳴猶未滅造化本無私爾生亦偶竊念方
三伏中日車午停轍下照人世間何異紅爐熱勁鳥倦
戢翼寧獸喘吐舌惟人於此時體懈劇疲繭虛堂幸可
逃枕簟隨意設好睡邊韶同素嬾稽康埒更此值清涼

酣寢謂須決雙睫才欲交汗膚遭爾齧營營不絕聲宛
類讒口哂使我寢不安欲息還復挈况如一簞貧未能
萬錢歆園蔬薦脫粟杯盤殊滅裂雙筋才欲拈咀嚼遭
爾餐適從何處來食飲汗修潔使我味不甘欲嚙還復
噎毆除付疲兵祇足增跛蹙宜哉孫權彈為爾情激切
期望秋風回一掃無餘孽偶此延朝昏勿謂風不烈氣
候侵凝凜龍蛇且藏穴爾形大且然豈能堅如鐵

書徐仲車先生詩集後

古人往矣名空存爾來冠帶誰其倫語言淵濶行跼蹐
俯仰不愧何繽紛先生道義完且潔去彼取此非今人
事親不但綵衣戲刻木省定長悲辛拋官却掃醉經史
胸中寧復留纖塵履穿袍敝窾不墨辭幣與粟甘清貧
自從秀髮到白首造次於是如一晨當知有昊憫澆散
先生故出援斯民嗟余稟賦雖不敏管窺偶幸知所因
講聞先生亦已久云為輒以書諸紳耆來廣陵兩閱歲
所得比舊尤加親此編雅什數百計覃思成誦驚余神

恍如聽樂周太廟黃鍾大呂皦且純又如典瑞出圭璧
璀璨滿目非珉珉偉哉固足信萬一髣髴相見容彬彬
吾皇圖治急遺逸空谷相望推蒲輪先生高卧焉得遂
細紮匪日頒嚴闥奈何韁鎖脫無計灑掃猶阻致此身
願言師法不少懈庶幾有立逃湮淪

送李光道承事罷高郵酒官

豫章拂青冥密蔭覆百畝初由拱把微封植歲月久大
厦搜棟梁匠者終見偶甘井如車輪千尋徹坤厚畚鍤

非一朝致力自培塿河流涸生塵源源獨清瀏李子素
綺紈操約世莫誘字畫尤勁竒往往過虞柳當其求帖
時髣髴昔人嘔吾惟蜩翼知豈暇卹衆口願言舉斯心
夙昔仁義數甘井與豫章勿使擅所有

送樓謙中赴江州德化主簿

憶昨隨侍遊鄞川窮探欲上蒼崖顛崢嶸古寺忽邂逅
眸子顧我驚瞭然子時苦幽慘無意揮麈豈暇論幽玄
星離雨散已五載誰謂此地方周旋胸中突兀富經史

欬唾落紙珠璣圓明明君王正側席何事版籍從拘攣
匡廬勝槩半境內足以寄傲追前賢穿雲漱澗徧所歷
妙句流落人間傳却來隱几北窓下博山深炷沉香煙
細觀身世究竟處何者當好何當捐紛紛萬事付一笑
聊復爾耳姑隨緣吁嗟二輪挽莫住願子於此同勉旃

贈茅山范道人

道人本是紅塵客曾把錐刀開胸臆一朝矯首看冥鴻
棄子捐妻人莫測三茅峰北華陽南凌亂烟霞閱殊特

築庵寄傲知幾年但見日月忙如織饑食落英飲沆瀣
策杖溪雲隨降陟蟾輝倒射松風寒長嘯一聲山欲闢
飄然行止信自由或到人間躡人迹朱門甕牖初不分
遇酒輒傾論斗石有時巧發驚四筵季主猶慚多失策
紛紛流俗爭稱奇豈識道人真所適茅君仙去空遺蹤
高行三千當自積琴閒碁罷宰相過却恐鸞飛無處覓

送宋司理赴吏部

古木暗長堤清漣漲輕縠南風恬烏檣動子歸興速今

日共一搏明朝各川陸我心久已灰慘愴輒眉蹙鮑叔
實我知嵇康亦子熟少年挺竒姿綺麗誘莫逐抑首掾
雄藩哀矜見推鞠季文每三思石慶懼譴戮多事如不
勝投刀斯中族重華雖前旒踈遯無隱伏雜還登俊良
能官真域樸行看萬里塗追電恣騰蹴赫赫繼家聲勿
忘勤聖讀

登召伯斗野亭用孫莘老韵寄秀老參寥

廣陵最佳處堂與南山平慨然寄遠矚溷濁為冰清冷

官從無徒猶阻窺朱甍矧茲斗野構名實久已傾距我
逾一舍何由偕友生王事有邂逅川途假新城登亭若
為慰饑渴甘太烹蓮花襲襟裾雙鶴唳且行一笑發深
省坐見星斗明回首莫逆交物外正采榮

寄樓謙中

三年客揚州鄙吝誰與晤美人海上來青眼獨余顧荒
涼吊遺蹤每每參杖屨敗意無俗物欣快平生遇陶丘
今杜門習嬾殆成痼麈尾掛壁間琴書自朝暮匡山正

倚天枕漱實幽趣清壯增筆力重規謫仙句相望越千里款段不獲驅何當繼疇昔把手論情素惟有月下桐秋聲已如故

效十二屬體

區區鼯鼠技不優鼓刀要使無金牛力探虎穴必有獲縱如兔窟焉能謀好龍既久乃龍至畫蛇添足豈蛇侔驄馬御史風烈在瘦羊博士聲名流棘端猶作刻猴用寶鼎忽患烹雞求相狗他年會見賞牧豕海上非吾憂

感年

一世三十年我今二十九昔人當此時事業已不朽顏
淵語心齋矐若夫子後著錄盈三千獨居四科首荀彧
王佐才智畧子房偶脫身作謀主談笑解紛糾元賓與
習之二李相左右復命索玄微詞章配韓柳夙成更超
倫初不愧黃耆項橐實可師仲尼安敢友孔融登龍門
元禮接彌厚叔度千頃波能使荀淑忸陳蕃置一室誓
滌天下垢賈誼入朝廷號咷動明后陸機文賦成見者

咸歛手禰衡孰比俊帝室宜見受李賀錦囊中佳句敵
瓊玖相望編簡上灼灼列星斗而我獨何人擬之一無
有追維故時事決背汗如瀾窮年坐井底曾不辨蒼白
多岐既亡羊畫虎欲類狗狂瀾儻不迴何以刷茲醜吁
嗟歲律逝易於屈伸肘分陰所當惜來者勿復苟譬彼
力田子耘耔肯鹵莽所期嘉苗成不使亂於莠血氣况
方剛龍鍾未為叟高名非我心沒齒庶無咎

洵澤

探得梅字

滔天降水非凡災平地洶洶生風雷帝堯哀民作魚鼈
咨禹平之時懋哉未暇雍容堂陞上和羹以爾為鹽梅
禹知休戚係予手汲汲豈獲憐嬰孩疏鑿高低捐四海
校量勢力天須回爾時荷澤次第及導引一股從東來
就中不獨豫州利八荒賴以川原開農桑處處酬願欲
鳥獸蹄跡還蓬萊此澤雖微與有力揭之載籍懸星魁
禹歸天上已萬祀遺利猶今分九垓帝里虎士不知數
朝昏待哺張其顙轉輸粟布自東部浹日何啻浮千桅始

知寸膠無足用安危須仗經綸才君不見黃河泛濫金
堤摧縻費皇家幾億財華衣肉食皆妙選年年議論喧
中臺

陶丘 得傍字

山河融結皆奇狀此丘之形誰與牂一成為敦再為陶
二帝昌時已詢訪至今禹貢名字存氣勢仍容荷澤傍
普天率土此其中雜還舟車來四向分茅開國南面尊
屢致千金謝齊相爾來日月幾春冬興廢相尋人物上

紛紛萬事已塵埃此丘迤邐初無恙平生苦死嗜登臨
准擬携筇事踈放冷雲寒日滿荆榛蕞爾令人重悽愴
會須東走泰山顛縱目乾坤更何障

默坐有感

後悔寧可追稱誤豈容數試觀古來人何以為先覺一
日三省躬此事在力學年光捷霜蹄我心羞齷齪

次韻羅正之提刑見寄

天邊故人贈明月恍惚如臨滄海濶幾年塵尾阻清談

一日中腸寬百結鍾君骨朽誰能琴流水高山猶到今
平生宮徵愧伯牙邂逅夫子還知心相期端欲追前古
諸事斯言逃責數青雲窮達豈須論廊廟由來齊子午
子午乃谷名隱
者所居見杜詩

王景亮携晁無咎清美堂記來求詩為賦此一篇
先生不出二十年幅巾種樹老盧泉盧泉水木清且妍
築堂流水茂樹間晁侯作記筆如椽畫欄素壁青瑤鏤
明珠白壁光射天先生矜詫喜欲顛春歸野岸綠漪漣

青山東缺如斷環雪消風軟山蒼然杏梢紅破臘脂寒
先生醉狂夢思山自駕草車東塵編上堂讀書門晝關
金徽朱絲弄猗蘭相思古人太古前若非豪士魯仲連
即是幽人梁伯鸞先生好學老益堅少時不信功名慳
青衫屢補履決穿晚知有命絕可憐歸來自買汶上田
糴稬香露凝秋殷只知留客有酒錢肯問釜粥寒齏酸
拖金曳繡卷曉班何似布褐暖且寬先生所願一何廉
貴人孰與先生賢朱門銅臭廚肉膾夜闌白月照管絃

美人一笑天桃燃安知賢達死丘園正恐後世終無傳
此意已輸先生先我今欲歸無由緣蕙帳依約聞清猿
何時相從一醉眠梨花楊柳傍禁煙曾點浴沂春衣單
德公渡沔應已還山中桂枝聊攀援

三牒亭

結構安在哉荒涼但郊藪無言對斜陽廬兒亦搔首唯
餘舊時春年年暗榆柳棄置勿復論興衰古來有

成陽

茅茨土階不圖好想見游宮滋草草有時警蹕從天來
諛語應無路傍老可封之民紛萬邦豈獨茲城知所保
穀林南畔今如何煙草茫茫車馬道

范蠡塚

山棲嘗膽時禍胎久已孕欲令蘓臺傾端俟天人應夫
子實奇才大事力能勝中分句踐憂內外各宜稱一鼓
雪前羞功名在乘輿向非斷以獨未必還千乘荊棘梗
寒宮晨朝露常凝可憐東門眼至此不得瞪烏喙鮮克

終天道亦惡剝脫身海上來嘉言誰與贈位高金更多
所向豈蹭蹬况有絕代姿提携充妾媵試看劍頭血何
如窮絕磴由來進退間處之貴不憚孤墳忽生疑文獻
良足證吳人未忘情高樓時一凭

恭王殿

昔人語君臣相須比弓矢乃若父子間至情非所擬惟
王適帝心重以才藝美朝來正臨軒墮丸未云已誰令
羽翮摧高飛為中止竭來天宇東基構傍荷水靈光屹

相望應陋苟完矣于今崇傳舍便是當時址那知王者
居日與行子市悲風起庭槐颯颯盈雙耳

送交代榮子邕

類宮久戢身所造益了了慷慨揖古人百為無一矯就
令力回天初不變忽眇璀璨文字間與此故相表服膺
今十年邂逅辱繼紹遇我逾故交微言幾昏曉可憐不
兩留行色逐飛鳥蓬山插青冥鬱鬱佳氣遠懷鈞謝風
塵大用此其兆願子更勉旃真賢古來少

端午郊園

叔度久不見我心如亂茅良辰適端午萬事聊一拋策
馬指圭竇同焉有神交森森千畝竹正爾清樂郊相與
造其下香泉薦嘉肴高談落美玉逸氣騰長蛟徑就真
樂處古音奏陶匏日車駐晴空木杪疑焚巢何必蒲葵
風翛然滌懣懣茲遊信物外孰與娛雲鬢無端消息來
主人隨鉦鐃會須更卜日城府方膠膠

送黃元明赴梁縣尉

豫章控江南山高水沄沄鍾此千里秀君家賢弟昆文
采映諸父鸞鳳爭騰騫伯氏晚相遇許我遊其藩聰明
置不用道術臻忘言安然稠人中容貌白玉溫求之古
君子端若李仲元一尉聊爾耳誰識君所存霜風慘黃
葉雪雨埋朝暾柴車竟行哉我心憂聾昏

次韻醇中見寄

此身風中蓬飄颻洛西豪

潁昌有所向
西豪里

不膠漆杜門天

自高坐懷平生友皎皎眉間毫書隨鵲聲來厚我逾綈

袍如何東野鳴亦復追離騷彼蒼久已均後逸須先勞
試看刀筆微他日猶蕭曹翹棄正多事要在舖其糟勿
謂伯樂死轅下終奇毛况乃掣電中幾許堪遊遨展江
涵清空春光集漁舸命駕裁數驛慰此心忉忉呂安何
人斯君首無徒搔

韓園

春風挽我出邂逅陪友生濱湖足勝事繫馬聊班荆
柳傲清淺孤芳媚晴明禽哢雜魚躍日轉無人行此間

已深趣繼踵仍高情
犀局自勝負玉軫誰虧成
盈樽不在飲會意時一傾
豈減七賢將亦云四者并
如何渺茫外忽起絲竹聲
未暇從爾爲目斷陘山橫

送宋子發節推

富貴如烈火銷鑠誰爲鋼
黃金攫清旦一視無四旁
夫子真璞玉炎炎詎能傷
萬事有規矩豈與時低昂
五十猶幕府鬢髮初不霜
天眼終自清彈冠指明光
卿雲澹朝日舞蹈紫爐香
勿憂雨露隔二聖方當陽
大器故晚成

此去未易量巾車難更輟
淇水徒湯湯

次韻崔德符遊湖

無雙藹嘉譽夫子真黃香
礪礪傲松檜人間自炎涼

平生翰墨中赤增戲蕭娘

古有此詩

潁川今何時鼓翼端來翔

西湖謝塵土危樓更斜陽
幽期得高士一笑歌滄浪
新詩落圭壁豈異連城償
胡為獨韁鑠不作逢瀟湘
杖屨行清秋從容酬所望

道鄉集卷一

欽定四庫全書

道鄉集卷二

宋 鄒浩 撰

古詩

次德符湖光亭之什

平湖泛日月清光渺無端并包入眼界危構何軒軒輪
蹄隘行路逸步誰與攀只應空曠中縹緲飛神仙我心
本虛室朝市成青山居然發餘照妙用同一天凭欄豈
無人杯盤爭擊鮮

簡德符

清標貌冰壺一見滌袪暑况乃北窓風窮辰薦佳語鄭
聲正喧天忽此聞祝叅坐令偕生疾不得砭石去我愚
雖絕人志氣肯為鼠如何城下盟欣然為君舉請看時
雨來潤澤先柱礎豈無力使然默感自難阻高堂久懸
榻寶劍心已許昨宵共燈花今作參商處秋意入梧桐
滴瀝關東序連牆莫至前念君初逆旅蛇影勿狐疑當
思啖虀杵桑蓬元四方事業在伊呂匪石詎可轉紛紛

任兒女但願早晴明交臂無齟齬更約靖節君相與富
毫楮朝昏經史間端知植禾黍他年羊子妻焉能斷機
杼君席果不分我知迓爾汝

用王憲韻寄參寥

天資不紛華脫身禮白足一笑語曹溪與世作眼目有
時戲毛穎新詩奴鄭谷翹然百家中疎煙澹脩竹頃年
古招提山青水澄淥傾蓋揖孤標令人慙逐逐平生稻
粱謀從此在鴻鵠爾來落高陽轅下方局促况乃建隆

師黃壚已埋玉豈必阮步兵途窮泣然哭賴君金石聲
丁寧鴈飛速我心端何如盲龜得浮木遙聞玉堂老初
情敦夏屋支遁久塵埃風流一朝續營營覆載間萬事
風前燭願言掃雲憲聊對傳燈錄

送張舜諧遊上庠

高木紛萬狀皆從毫末來天時與人事相資以為媒根
本初不同他時終異材東風動霄壤繁華媚池臺花板
竟無言車馬爭徘徊霜雪一朝怒孰與松柏陪青青幾

千尺寒峰正崔嵬向來絲竹處索寞空塵灰明堂屹南
面梁棟支傾摧匠石有青眼肯為桃李開窮年後悔心
何似今日回

穎橋僧舍壁間有詩頗怨不遇因次其韻刺之
食肝何必馬食魚何必魴趣操苟冰炭誰能屈鄒陽人
間所榮觀金門與玉堂患失紛鄙夫白首猶悵悵豈識
君子心草衣如繡裳藪澤方尉羅鵠鵬已翱翔

路傍草

洪造初無私物自生殊異叢叢路傍草枝葉一何悴行
人或陵踐牛羊肆殘毀縱能勝疾風厥害還遭值瞻彼
山中蘭孤芳常茂遂馨香動君子采擷遠而至須知得
失間所托惟其地嗚呼儒衣冠如何不尚志

午枕有感

宰我嗜晝寢邊韶仍愛眠當時師弟子指摘良紛然韋
絃以為戒僂俛亦有年分作蠹書魚文字相周旋縱不
叔夜懶猶慚頭在懸如何到此地午枕有所便晨飡未

停筋睡思潛予牽矇矓眼自醉百體柔於綿茗飲雖再
三驅逐無由緣解衣卧北窓徑走姬旦前往往隨物化
飛躍參魚鳶老木森古砌日轉驚鳴蟬矍然整巾屢衙
鼓忽已傳由來棘園中疎放成拘攣氣血似止水鬱鬱
為此愆何當徹門牡四顧還青天朝昏遞消息有節亦
有宣焚膏續清晝冥心寄韋編徃失固莫救尚得來者
全聖處幾萬里行矣勤着鞭

次韻鄧州范仲成秘校見寄

落筆文章真宋玉八面縱橫欺炙輶潛藏頭角卧南陽
別足豈是王駘辱每嗟愚賈謾操金他日辛勤只書簾
丈夫事業會驚人誰知范叔成張祿相逢憐我再薤鹽
不羨高門厭梁肉追惟吳國舊時蹤山澹晴煙水輸淥
幾年嵇阮作參商漠漠茂林空自竹懽然一笑換淒涼
端遇牛公容杜牧爾來日月更中天未應寂寞飡秋菊

用前韻寄鄧帥杜君章學士

策府名卿厭鳴玉竭來南陽朱兩轂胸中雲夢吞八九

終然不貯閑榮辱坐令政事邈前人容易端如探筐簾
去年持刃今扶犁所至熙熙豐穀祿華堂夢斷燕絲簧
笑謂鄒枚不如肉公雖飲少客自醉但見銀餅倒輕渌
明明天子正搜賢真賢繼踵還符竹勲勞矧已疏屏風
八命難淹一州牧願公快向百花洲更集賓僚勤把菊
用前韻寄穰城謝公靜推官

邂逅蒹葭來倚玉淺見慙如視車轂荷君傾倒過平生
妙處令人忘寵辱并包今古入靈臺欬唾珠璣幾盈簾

紛紛年少多公卿何獨斯人猶寸祿南陽刺史今伯樂
歎息龍媒異凡肉刺章求以助風流豈減紅蓮汎澄淥
更將餘力付蟠根迎刃無留真破竹才全如此帝未知
燕閒却自思頗牧東山出處是家風莫學淵明戀私菊

公靜屢言
非晚歸休

范仲成約非晚過潁昌留數日因鄧兵還追用
前韻寄之

勿歎卞和猶抱玉勿嘲楊雄未丹轂由來識拔須待時

阨窮不是男兒辱相逢相別竟匆匆
賴有好詩藏敝簾居然成誦想英標殺馬無因愧持祿還家青鏡覽形容
鞍上豈徒消髀肉故人要我泛西湖萬頃瀰漫漫天淥坐中寂寞欠車公
只應冒雪歌黃竹從今塵榻掃南窓日俟高車起耕牧懸知樂事與衆分
把琰追論燈下菊與王仲弓分韻得東字

西豪星聚時有客還類宮解驂聽揮麈落落凌霜風平子幸我厚繆入題品中夷甫不復言目繫心已同
塤簞

競遠韻欣逢吾道東平生仰高山鵠立拘樊籠誰令燕
雀微一旦追冥鴻明珠繼來投照夜驚兒童從今日虛
徐所冀資磨礱只恐天池鯤朝夕搏晴空

次韻仲弓見贈

我生分稽古未始懷宴安萬事不入眼人間自悲惟獨
於文會時所取良必端起廢賴發藥他年逝素餐蘓君
日千里逸步逾飛翰一從斷金來況也寧永歎于今更
天誘還逢魯圓冠傾蓋如舊識禮法能見寬須知高門

中階庭富芝蘭何獨仲弓家弟兄稱二難琴張誠可友
願言謝外觀聖域渺無旁觀水須觀瀾

送裴仲孺攝汝陰尉

我讀醉翁思潁詩恨不六翮西南飛潁宮竭來潁水
潁水雖同非潁尾羨君匹馬秋風前吏隱去作南昌仙
霜威凜凜肅普天環湖瀟灑皆當年時豐饒鼓如寒蟬
想見絲綰上釣船太白還光醉翁死隣家仍無隱君子
山高水深誰與知只恐未樂君先悲朱方豪士森戈矛

青雲蹭蹬猶督郵不如黃雞白酒相與醉即休

次韻世美遊嵩山

肇分五嶽尊上帝委奇石維嵩據地中屹立萬仞壁遠
與四鎮殊式應土圭測有人仰崇高坐厭拘名跡邂逅
天際來驂騶脫車輶將聖祭泰山此心豈懸隔擾擾塵
土中一朝復一夕聞君有風期欣然雙蠟屐焉知馬足
非迥隔千峰碧古人亦多端相望託幽寂法音動山靈
松栝惟所適寄徑登顯途自恃捷無敵遺轍諒未泯一

一可遊歷借問去來人誰堪比心迹

送崔子厚朝散倅安州

君家如武庫人物常森森伯氏妙難測一笑冥古今蒲
團與藜杖終然作知音王事挽以去歲杪霜雪侵輕軒
奉白髮遙指甌山岑臣子難有已忠孝亦已深南方擁
兵刃調發多呻吟使民還擊壤屏星實分任况乃功業
本從來在無心獨恨鑠天北誰與同瑤琴

次韻仲弓見懷

與子風雨散掩關非世喧琴書到古人危坐屢忘言何
當同此趣脫略文物繁歲晏猶清居厲節真王尊

悼陳生

鄧川進士陳生者失其名字頃赴舉開封後時于是寄海舟經通泰而西焉同

行十舟一日前舟逆遇暴風覆溺殆盡獨陳生所寄舟四帆轉舵隨風以往已而陳生乃獲遊古天宮院蓬萊峯浸久思歸就試天宮人固留之莫能奪比歸則妻孥之墓木且拱矣皇皇閭里間追惟昨者所接始悟其風塵表也復欲從之而不可得遂病狂以死唐城令建安章潛顯父語其事故作此詩備他日寓目云

豪商破浪隨東風
轆轤相繼滄溟中
回環極目渺無際

萬石之載裁飄蓬一朝六鵠不得進十舟八九成虛空
一舟邂逅脫魚腹開帆豈暇論西東大明出沒夜復旦
何許清越鳴晨鐘舟人側耳正驚喜忽瞻水際排奇峰
落帆沉疇泊古岸介然荒徑雲間通鄞川書生託舟尾
見之踴躍追猿狖扶疎怪木進十里突兀古院題天宮
入門長廊轉寂寂堂上高拱厖眉翁左右侍立滿三百
談玄演義聲玲瓏相逢問勞憫流落旋啓虛室棲行踪
紛紛袍布欺臘雪獨此錦帳朝霞紅黃金白玉薦豐饌

藥苗蔬甲青茸茸主翁自言避巢寇竭來不與中原同
于今天子果誰氏語罷默默如盲聾日遣二子共遊處
因得細詰開冥蒙皆云我輩號處士名字非列神仙宗
三等三百奉一主上等第一裴休公提携峻陟幾千尺
笑秦亭上聊從容秦皇可笑笑不已聲撼亭角摧穹隆
徐福曼倩亦何在前後石壁猶房櫳舉頭指似蓬萊島
霜雪直上磨蒼穹波濤作勢撞山脚魯有神聖躬磨礱
欲令異物知所畏周遭水面盤蛟龍書生名利浹肌骨

塵念日久生心胸老翁照見輒微笑血盆再入寧易攻
蓬萊有路爾常覩此別曠劫無由逢吾今舟楫助爾
往爾其登覽庶可窮日輪迎曉傍山出水聲先沸驚竇
窪赤光散合動天地頃刻氣候分春冬高低殿角屹相向
一一鑄鑿非人工窮晨不復值仙子卿雲瑞霧空蒙籠
詢之處士盖有謂近世人迹幾相重鸞驂鶴馭厭凡肉
矯然遠舉歸鴻濛先生呂翁獨於此一年三四眠松風
書生塵念竟不斷主翁但問何所供人參如人更長大

願乞數本扶疲癯翁言此物有神護特經海道須罹凶
良金美玉亦至寶爾誠欲之吾當從慇懃教告豈一事
尤戒卧語詳初終楞嚴秘密偈四句奉以周旋宜恪恭
書生再拜起沉疴轉盼已入鄞川封還家妻子久黃壤
單形隻影反匆匆却思投翁事清淨天南天北惟飛鴻
茫然進退真捕景一生顛倒終狂童君不見秦皇漢武
操利勢自許神仙力能致海邊方士日從橫畢竟千非
無一是書生徑步蓬萊巔况乃天人勤指示若為名宦

苦死堅失脚青雲墜平地仙兮仙兮一何異求不求兮
兩莫遂我雖忘情亦歛歔仲尼之門非所議率然作詩
紀其事

次韻世美冬夜見懷

君家儒學頻公侯豈知孔孟窮於鄒他年事業知未艾
誥誥孫子多清流紅蓮上客更超詣勁節耻與今人儔
自言名宦亦何有回看家法長包羞蕪城歲月已波逝
竭來文會消吾憂青天白日有崔子亦許交臂聞嘉謀

人生南北那可必合散倏忽春雲浮會須着鞭入聖域
無使後悔空冥搜

送德符還陽翟并簡陳叔易

霜嚴識蒼柏火烈知黃金不有小人謗孰窺君子心前
程已如此紛紛矧於今衡門杜朝夕巧舌猶追尋一與
接為構何以逃交侵任大始多事由來天意深北風動
秋夜興落西山岑逸駕豈受挽耿耿聊分襟太丘阻眉
宇為我先寄音漁父可師否茲焉共浮沉

烹密雲龍

君不見子建七步俄一詩太沖十年僅三賦相去何啻
楚與越爾來題品皆才具我生尚友到古人袖手寒窓
重慚懼巧遲拙速非所長每泝湍流只如故秋風逸思
誰肯分惟資茗飲祛昏瞶人間氣味足奇功畢竟不能
成好句集仙公子天上回拭目元豐新制度夜光明月
豈足珍矯矯真龍翳雲霧潛藏飛躍自有時只恐緘
滕終不固况聞醉翁歸潁東更號六一迹機務震霆端

的助滂沱名稱恰應當年數從今掩卷待青禽晴軒屑
玉和甘露胸中無復舊塵埃五物狂吟在朝暮須知料
虎威自貽莫譏惡客君家蠹

次韻蘓子駿寄其弟世美

霜風戰蕪城耿耿袖間手裁冠何許來逸氣蟠九有入
眼無可人終焉收下走舌端寫天河那知膽非斗離亭
巧梯媒節物幾榆柳所向曹匡阿剛腸欲雷吼饑寒挽
柴車莫獲親可否年來但韋編妙處知不朽規模綿古

今元自一布肘脩然環堵中未覺羲皇久三復鵲鷁詩
亦已等妍醜此心千里同豈愧鼻如口更聞隱君子隨
風落巖數崇朝公事休嗜好杯酒幅巾歛玄談聰明
謝天誘萬象懸目前軒豁開戶牖坐令黃堂上觀淨亦
成垢維皇急親賢承庸拔師友丘壑難自娛巖廊拱文
母只恐行賜環仙去誤雞狗與其羨長生孰若壽黔首
一語君試聽黃梅未當剖

靖節堂分題得重字

儒衣隘綿區冰炭非一種邂逅心事同清標揖孤聳駕
言仁義涂相與戒前從廓廓膺肺間何由納天寵春風
入高堂文字競拳勇妙句窺杜陵微語傾叔重翹然真
四變吾道有扶擁遂令斤鷄姿端為鐘鼓悚從今日喧
妍勝處宜接踵獨恨韓城君伶俜泣新壘

次韻崔光先見簡作詩催春色

春遊有客忘朝暮酷似經星好風雨豈知仲蔚長蓬蒿
寂寂儒宮裁一畝新詩故委黃耳來舌在驚疑為頻吐

鴻鈞覓運掃輒蹤萬物終然歸鼓舞去年枯槁欲樵蘓
今已蕃鮮媚農圃我家吹律信參天苗裔非才聞無覩
族寒官冷自離奇安能仰贊媯皇補廟堂燮理皆少年
佇見囊金罄花塢

送幼安赴澶倉

人生本逆旅行止良悠悠試看康莊上轍跡多成溝公
子分閑戶時來亦何由載書曉遶邁邁春令方如秋河濱
古城府稅鞅聊優游青雲捷徑在氏庾非君優臧孫故

有後斬斬承風流故為重作惡日暮猶登樓

仲儒烹密雲龍得烹字

清都密雲龍遐方久馳名無因飲天賜歎息非公卿爾
來牛斗間瑞氣蟠縱橫龜書識至寶近在壁假城物色
到君篋發視凡骨驚君心本鐵石從此亦變更自言匹
夫耳乃有懷玉聲羣嘲杜潛隙徑約良友烹伊予豈其
人重以慰平生可憐謝康樂新詩徒爾鳴

謝公靜舊嘗
作詩督烹之

無効

鮮于大受蛻軒

斲輪知讀書解牛知養生天下一致耳冰泮無餘情向
來所筌蹄俄已蛻甲輕豈必吟澤畔始為當世清魯堂
殆庶幾居然黜聰明蠢蠢冠屨間胸中妙難名鼓鑄雖
有自竟脫模範成詩翁既僊去委蛻今韓城閉門作龍
蟄端俟風雷驚文史聊寄徑與古將抗衡何以識此心
標榜輝前楹他年付卷舒會見推善鳴應憐劉季陵寂
寞初無聲

送鄭祭酒得宮觀還鄉代至虛

閩中男子多儒衣龍驤虎視惟四夔門前蓬藿老風雨
籍籍聲名天下馳爾來半作古人去亦或霜鬢甘伏雌
獨隨日月上星斗即今先生侍丹墀先生胸次真武庫
無所不有世莫窺早年剖符勤撫字晚年賜環妙論思
朝廷遠覽得治本務先長育英豪姿凌雲大廈豈一木
要在鉅細皆其宜先生彬彬揭模楷仰膺帝可端為師
鸞飛鳳舉徧臺閣辟雍祭酒終不移下帷端坐對沉燎

諸生自耻專浮詞斯文與天共澄霽肅駕聖域無多岐
他時合抱挽梁棟論功較德誰高卑先生胡不長風憲
豺狼在念略狐狸坐令飲恨深發喜簪纓無復藏奸欺
先生胡不同翰墨形容堯仁曉天涯魯官典誥從此復
大哉王言非寄私先生胡不秉樞極以道揆事如著龜
河防民役有定論簡拔賢俊去嫌疑吏員一一底乃績
二虜拜手受指撝東西南北幾萬里匹夫匹婦違寒飢
人言太平亦無象但見父老同兒嬉胡為五湖入清夢

忽焉幽興落武夷千鈞一發誰挽得徑約赤松歌紫芝
長安車馬競回首頗似巨源辭位時通德高門想如昨
溪風旦暮猶有期冷然杖屨遠俗物此心惟許江鷗知
巍巍北辰拱天子還淳直欲躋皇羲人才未登常側席
鶴書每每空山茨金甌况復舊名氏只恐先生難自怡
元魯侍親還以凡今之人莫如兄弟賦詩送之

并示至
遠至虛

秋風卷輕帷似送東歸帆親心為惻惻穀馬馳兩銜吳

江渺清冷吳山鬱巉巖侍行不爾俱官曹猶治凡

又

北去青山門宰木行森森吾祖不可見歲月成古今侍
親奠雞酒應慰父客心爾心故自慰爾兄弟沾襟

又

爾生見天地較我兩歲遲兒童作壯夫恍若旦暮期詩
禮久服膺飛鳴當及時慎勿醉鄉去志士良耻之

又

姑蘓一都會井徑分龍鱗風俗如鄆城臧否朝朝新况
爾隨侍子動與嫌疑隣延篤儻可師不如陪古人

又

至遠挽不來庭竹屢墮籜剖魚得素書頗說甘寂寞矯
枉勿過正執中思子莫他年同我心俯仰無愧怍

又

至虛走橋門所樂在羣居羣居固可樂他途亦紛如合
抱自毫末要須慎其初大帶有餘否此語當急書

又

詹何我師友

詹抃何天發

文行懸高名天命豈易度棲遲尚

柴荆省定餘白晝相與發大鳴才進非故吾從此難為
兄

又

四人如四支闕一不成體故為各天涯阻異晨昏禮但
願器業成高陽亦兄弟此意何時窮潁川方瀰瀰

次韵德符夜訪世美


蘓子甫及瓜裝齋動簷楹念此不數見柴門行晝扁幅
巾策藜杖邂逅諸友生涼月委新照無煩聚飛螢惓然
造空洞卻顧輕簪纓齏鹽未果腹飽德如楚萍只應他
夕來矯首心盈盈

次韻樗年見簡

一身能幾何首尾復自畏豈知塵表姿落落惟所值官
攤忽相逢欣悲十年事須知襲人間舒卷在母意他時
況英聲曾冠通侯次行矣方坦途真賢不難繼

用前韻寄鄉中諸長者

鄉邦藹儒冠後生良可畏
况乃領袖賢疑與古人值
爾來索吾居南北幾歲事
冥鴻雲外心疲馬風前意
遙知松菊間青編煥鱗次
何當返柴車故步懽然繼



道鄉集卷二

欽定四庫全書

集部
道鄉集卷三
四

詳校官庶吉士臣吳烜

侍讀臣孫球覆勘

總校官中書臣朱鈐

校對官典簿臣劉景岳

謄錄監生臣劉人鶴

欽定四庫全書

道鄉集卷三

宋 鄒浩 撰

古詩

次韻德符過曾園

東方澹殘星車馬各有之心落聲利間
搖搖無靜時幽人獨朝徹蟾光濯漣漪
賦詩鷗鷺邊妙絕中郎詞青時正相嚮
白駒忽已馳歸來攜我談聞風徒振衣

又

數子清玉峙粲粲凌朝輝持竿謝高風鉞囊聊自攜豈
不一趣尚因緣非兔絲比去得幽圃相與無町畦白鳥
亦忘我共此天然姿只應太史奏還在潁水涯九原審
難作幸及同襟期

次韻仲孺見督烹小團

世事多好還往躅端可視峯巖輝奇功頗愧文王肆他
年焚舟來幾作塗炭墜駟馬豈及追我今亦如是狂言
編虎鬚得報逾插鼻平生儲春芽美惡初一意濁氛騰

墨雲君舌故歷試小龍落几前畢竟不知異方欲事烹
煎薑鹽以為使蜀人煎茶之法如此賴君呼回頭綵桐識秋思會
當掃南軒石鉞沃清泚從此師金人三緘誠有味

再酬仲孺

龍團方啓封數子已驚視端如肖壁人騎羊入城肆又
如金谷姿不合樓前墜囊衣本酸寒茶具無一是紛紛
詰隣家浪欲學擁鼻秋空輒雲雷秘惜乃天意未敢還
巾車且集諸生試豈非今年芽歲月與君異直須如印

荆詩驛趼來使念君才患多落筆有餘思盈編故可期
河流幾時泚君應嘲馬肝不食亦知味

仲孺督烹小團既而非真物也悵然次韻以謝
不敏

情偽初難分飽聞不如視君看求馬時安得走唐肆此
茶亦先聲入手恐失墜冷然風御還共飲乃非是坐令
竹邊心追悔如刻鼻故人豈欺予姑以將遠意由來毀
譽間夫子猶必試八林志多金龍斷何足異胡為不三

思取信輜軒使超超莆陽公銓量妙清思仰止一喟然
背決欲流泚尚賴君詩存高吟忘肉味

戲世美

揚家絕藝十六絃公卿往往趨賓筵妙齡才子更豪酌
月中醉倒西湖船楚宮殘夢幾春曉五陵好事猶喧傳
只今展江嘗託足香風帶恨留苔錢誰令故人不他寓
竭來亭上仍秋天幽花脉脉鑑清濕似與當日爭蚶妍
此心如水平澁那堪鐸撥還鐸然驂騑夜半解歸鐙

青燈炯炯空韋編砧聲漁唱起何許坐久波面生寒烟
故應鷗鷺有深意忽焉鼓翅鳴窓前

十六夜府會湖光亭呈世美

使君終宴先歸休菱盤藻帶妨移舟湖邊何處月已到
觀音堂下寒光浮鼎來談笑托新興沉沉萬籟乾坤幽
雲端飛翼弄清靄波間戲鬣吹輕漣涼飈襲塵了無迹
似動不動蒹葭洲却觀落日倚欄處天東縹緲橫高樓
不須要月共形影吾曹茲焉成獻酬單衣盈露坐忘返

亦忘佳客相與留始知人世惡塵土生平今夕方中秋
昨宵蓮社二三子偕問賞心如此不

次韻德符訪世美

秋晨飯香積舉袂清風生竭來展江道老木森亭亭纖
埃不隨步昨宵寒露零人境兩相值簡編煥新晴遷固
久黃壤椽筆窺群英崔子獨異趣一笑鉛槧輕詩成似
金籥為我開塵扃

敬讀仁祖實錄用前韻

嘉祐紀庚子犬馬初冬生安知拱堯舜不事沉香亭爾
來百寮底霏霏清涕零弓劍誰與問白雲飛晚晴恭聞
語乾造凜如班集英遺恩泰山重死報鴻毛輕聖孫主
纂承行當叩天扃

送杜君童學士赴闕

西風獵獵鳴旌旗南陽學士趨丹墀南陽父老挽不住
家聲復如東漢時堂堂材具中梁棟鬢邊寒暑驚駒馳
垂衣繼照揭日月只應一見舒堯眉鸞臺鳳閣有新路

着鞭寧許駕駘知委身報國一心耳疑如嵩岱誰能移
他時廷尉妙生死還將此道供論思凌雲大廈肅天宇
千秋萬歲無傾歆焦頭爛額豈足尚長堤蟻穴今圖之
回看蹇淺丈夫子攫金清旦方沉迷矢來無鄉亦可卹
付與公議分高卑前人得失煥清簡納公胸次無子遺
願言朝退坐華省更以反已為元龜儒冠往往喙三尺
勿令白玉生瑕疵

世美歸侍政府以送君南浦傷如之何作詩送

之

汎汎蓮花池日月幾賓送乳燕辭故窠征途亦飛鞚會
合安可常萬事驚殘夢何以寬我愁風流在民衆

又

妙年公卿子可人逢此君退然數尺耳氣節凌青雲從
今奉親暇簡策陪朝曛應憐四傑流勤勤但空文

又

巖廊拱真人妙與天地參政教似寒暑豈罪樵夫談水

鐸久不振相府方潭潭公子飽見聞歸獻北斗南

又

忠孝非兩心事君如事父事君貴以人事父孰為愈真
賢絕驂駟骨相未易取願子繼法真母令老江浦

又

前年可羅雀朱幡出濠梁今年可炙手袞衣登廟堂公
家本金玉何曾變炎涼公子不展眉端為斯人傷

又

卞氏稱六龍公家宛相如久作風雨散于今共詩書山
前猶製錦江上方題輿遙想側心夙夕鴈與魚

又

猶子知幾人予獨欣白眉風霆破春曉怒翼鳴天池未
促南昌行還為竹間期儻及馬伏波一書重示之

又

蕪城兆霜雪潁川凋芰荷昔別情已矣今別情奈何英
英二三子行亦車懸輻後日知誰同蟬聲猶暮多

送杜堪才以江漢故人少為韻

與君本南北作吏本一邦詩書雅相好旨酒空盈缸歲
晏賦歸去冉冉車輪雙我亦非匏瓜茲焉念松江

又

杜陵世多人風流自唐漢振衣入朝廷玉立爭璀璨若
人獨何為轅下尚羈絆舌在且加飡慎勿發長歎

又

秋來幾何時送遠驚已屢山川澹無情蒼莽亦非故分

與人跡踈韋編對香霧只應知此心西陂有鷗鷺

又

青衫勿自少委質皆王臣貴賤物外耳直道惟其人下
惠信先覺到今如北辰居閒儻未能君志終當伸

又

漢水方涸流梁園正秋杪駕言托朝昏陳事有臺沼他
年李杜來慷慨識者少安得從君遊一笑今古了

馬叔寶寄種竹詩次其韻

窮年不揮斧歎息無妙質誰知深眇中環堵以為室紛
筆如萬牛力挽未曾出論交餘此君聊為拂巾幘人間
方好竽蕭蕭乃鳴瑟茲焉得所投陳雷信難匹昨來面
墻心舉倡有風日莫似白樂天殷勤在兜率

雪中對竹

飛雪一何情拜我南軒竹駢頭控於地默默隕信宿寒
花本輕揚叢集乃折軸況此梢雲姿蕭然異凡木飄風
亦狂生端來助靈蹴似欲揉直柯繞指惟所欲焉知天

與剛初不愧幽獨罄折雖爾為且異望塵俗晨光破沈
陰春色盈兩目風雪安在哉竹猶故時玉

次韻韓君表雪中感懷

龍衣不解顏憂民向來急天高委真符年豐兆原隰連
山水氣昏過雲鴈聲澁先春凌馬奔投隙作塵入瀕竹
乍蕭蕭驚風還汲汲頗輕花闌狂肯共雨爭濕夜半
回曉光木杪森鵲立開編適吾心鼓枻輟清集一飽儻
可償萬事非所及想見秋稼前腰鎌荷青笠

用前韻寄德符

叩門無季心爾來空緩急若人作枯蓬隨風落遥隰袖
書珠玉昏匣劍蛟龍澁雪花陵春陽山寒擁扉入孤松
初自高短綆豈易汲伊予不逢年所嚮驚束濕分携忽
歲遷結念成骨立蕭蕭清湍濱冉冉白鷗集盟好何當
尋瓜時亦云及東游儻未忘蘆邊一漁笠

德符頃有伯
鸞下吳越之

句

次韻仲孺夢與世美諸友同集

簞食棲窮閭綵衣煥華屋公子謝羣居幾年羊胛熟逢
迎紛故人趣異終疑獨精誠洞虛無相應比如竹不羨
春風前流鶯囀喬木勤勤通昔心全勝書一束胡然亦
神遊邂逅同夢鹿夜旦環中來夢覺更主僕只今所見
聞轉手驚莫復冰釋倘未能茲焉良可燭

次韻和韓大資湖光亭對雪之作

巖廊未旋歸故國聊自晦塵表澹崧高胸中妙天對豐
年隨政還嘉雪徧境內從容陟九層指顧紛百態經綸

動初心枯槁入長嘔雖陳北海樽終念東臯耒只應沙
路乾依前符帝賚

送曾仲敷赴慶州司戶

棲遲潁水無三年四見長途事鞍馬問君胡為樂驅馳
告我吾非苟然者向來庭闈故當爾今乃從知古塞下
男兒出腹在四方齟齬南窓吾未暇隻手扛鼎非吾力
百步穿楊非吾射眇然軀幹僅數尺智畧豈分子房亞
詩書禮樂工作謀元帥軒軒更儒雅相知不與今人同

往遊其藩躍如也君言慷慨得我驚我有私憂為君寫
魏魏法座天中央萬物生成得陶冶邊塵吹風不見人
麟鳳猶阻遊郊野煩將此意問元帥何當鐵甲懸高架
君家一唯如雷霆震動乾坤失聲啞願回廬阜異時心
白刃前頭薦瀟灑家風欵從千古還上策酬恩真土苴
口終拂袖兩無言因送飛鴻不知夜

次韻仲孺見懷十二韻

江梅飛故枝桃李日夕更宰物初無心芳菲自奔競幽

禽銜真如歷歷喚不醒東里似得之與春忘謁請顏然
遽廬中槃薄天地永交情海漚發吟興秋翮勁璀璨十
二旒陶謝不獲騁須知雲氣蒸未害山石硬但君已追
風顧我猶蹇乘試馮作詩光普照萬物盛物盡照亦空
何許開絕景他時從此來一眄躡千聖

次韻世美見寄

鼻端漫故蠅心與天地遠聲容天地前長似西湖晚判
合亦何常從古車輪轉君不見儒衣壤壤趨白頭幾人

管鮑情相收我豈季子難之鄒行矣同聽黃栗留

與仲孺破兔餅色味皆惡同一絕倒既而述之
又烹小團亦兔餅也作詩報世美

爭携懃意烹春風終焉臧穀同一蹤莫言不落第二月
須知所好非真龍竊香安得青瑣趣效贖頗慙西子容
此言雖小有大喻馮君轉達禪時雍

與仲孺文仲述之作詩送仲弓赴籍田以之子
于征為韻分得子字

鳳園佳人孤鳳起草木無光春披靡紅亭碧沼政高深
借問何由駐雙履王涂開泰日月中玉堂仙翁是知己
瀛洲蓬島未橫飛且向籍田聊爾耳北道仲容休說貧
東山太白誰比擬雲汀荷芰供遠涼遶砌青青更蘭芷
丞相上馬臺閣空長鞭往往城南指君身雖不作羊羶
自然塵表門如蟻清談秀句得豪英合抱他年鬱松梓
要須萬口一同聲文恪風流今有子

次韻劉元因贈王幼安

真人拱南嚮羣英紛玉除
趯動環海夙懷思遠攄爭
彈冠上塵丘壑空故居之子建安裔少長惟詩書每笑
靖節君歸來但巾車擬倍萬乘器璨璨雕璠璣終然怒
劍橫銳氣埋憂虞須知夢鏡中所適難一如倘不達本
原觸事成自誣試焚定慧香矯首瞻六銖於此發深省
鼓瑟猶吹竽

次韻錢濟明訪定力僧及寄吳行古三首

門前朝市喧門內山谷寂
昨來有慮心到此了無迹
况

復有高僧炯炯雙眼碧渠今未易親拄杖鳴百尺知君
從之遊勤我遙相憶安得雙樹傍題名拂塵壁

僕元豐中寓寺

舍累月題
名壁間

又

北闕來新榮南溪抱初寂二子非世交窮通偶殊迹詩
書寄平生孤雲卷晴碧遙遙天一涯回首無咫尺伊予
亦鄉邦豈敢煩記憶尚誤分隋珠宵光動墻壁

又

萬物遞先死，憧憧嘗未寂。中有不動尊，隨方示形迹。巨
海何曾波，長天自來碧。誰令失坦途，認此軀七尺。空華
初無根，欣厭浪思憶。君今倘回光，奚須鑿隣壁。

寄題孔先生行歌亭

仁皇御宇作太平，朝廷玉立森賢英。巖耕溪釣日寂寞，
何獨先生歌澠城。遭世不比徐孺子，設心不愧司馬承。
唐虞垂拱豈不盛，巢由亦自非公卿。冥冥三聖妙相遇，
六爻一半曾吞并。倏遺象數入天籟，無聲之中端有聲。

有時鼓腹散秋步有時擊壤舒春情他年野叟得不盡
獨與杖屨同縱橫故知造物有深意鳳凰來儀治功成
鳳凰飛去定難久直使先生為鳳鳴先生道德初不死
先生歌聲猶可聽微風淅瀝動草木幽禽上下喧陰晴
可憐雙耳不到此龍山湓水空危亭

送文仲省親

曾參愛孝通神明樂正子春遊其門下堂傷足不忍出
流光至今覃後昆阿文全似李令伯更相為命母與孫

母年可懼髮委雪諸父駢頭埋九原淮山之陽歸未得
飲啜無以供晨昏脫身來寄豈獲已方寸搖搖旌旆翻
飛雲入望且還岫况乃凱風吹棘薪白水真人挽不住
却垂故橐馳京塵皇天后土識君意如君勿憂長賤貧
賦羲皇上人分韻得風字

妙達萬物祖天地生胸中坦腹夏日眠五柳來熏風不
絃虞舜琴不觴唐堯鍾况復羲皇前豈直將無同

送大受赴天官

元祐真人初御天四門穆穆來忠言閭風學士望朝野
即日賜環司諫垣當時同列繼登用獨先朝露歸九原
位不酬身在孫子嶷嶷諸子聲名喧叔也縱橫五經內
娛目未始窺家園苟聞某所有賢者弊車趺僕從之奔
甘陵南北正分黨攘臂其間無怨恩未見其止見其進
會須一指收乾坤素冠俛首琴復御鵬飛九萬方化鯤
于今怙恃只明主肯與世俗均寒暄早知妙筆三千牘
矧已慟哭論元元韓城父老儻改作為報及此高閭門

雙壁歌寄馬叔寶

君不見朱公託身天地中四方萬貨常憧憧其間雙壁
最奇寶分明日月生西東問公酬價初幾所一者千金
一半此精神肉好非不同側視裁差厚薄耳公心夙悟
誰得窺但無故橐無留貲交貧族遠富衣食高義日與
清風馳梁人有獄久不決君臣相顧空嚔眉公來答問
只一語群疑亟判如著龜須知成效異霄壤頗恨儒冠
多失之多失之胡弗思他年薄俗待爾移奈何壁價先

自虧

送表兄華元翰赴四會尉

頤山潁水天西東四載相望二千里我守枯株未得還
君逐飛蓬忽然至坐令桑梓落眼中頓覺精神到塵外
昔人逃空喜足音况乃謦欬逢昆弟此會由來天子之
幾日冷風清暑氣君才榮華早馳名荆國先生曾改視
殿前射策失龍頭仕處波濤起平地胸中萬慮不一施
却作明時嶺南尉太夫人年七十三諸子半掩黃壚逝

蘭陔養志獨賴君路遠何由復迎侍當思有以慰其心
莫把光陰較榮悴本朝丞相豈不盛尚輩流人已三歲
君今補考裁秋冬託身民上與之異蕭條官府似僧居
春入梅花更堪醉要須相與無町畦卷舌為喑真得計
我家宅相世所知矯首南雲從此俟

送章顯父推官改官

高堂夫人九十餘一子晚方趨仕途前年封邑非子致
更待子榮新命書子紆墨綬來漢東百里氣和年屢豐

聲名籍籍動羣耳還似當時詩賦中諸公欲默安得已
爭遡日邊飛薦紙拔身左選歸尚書攄發平生從此始
攄發平生從此始未足為子增欣喜所喜榮親有期矣
郡邑疏恩壽覲齒斑衣兒啼奉甘旨

寄仲弓

道德不與祿位期富貴自隨時命至君賓以明故自銷
禦寇於羊知去意城南豈復異墻東詩句由來勝刺字
直作朱游真丈夫莫使小生敢相吏

次德符六韻

書懷二首

秋容未覺成蕭颯脩竹疎桐陰四匝先生歸駕挾西風
墮我南堂似凋葉對牀邀月入高談夢想從來謝三接
是非火作正炎空忍與紛紛競牙頰莫欺鷗鳥不知人
須信天機在眉睫妙哉託處無何鄉一念能回百千劫
君誠有意涉其流請為安行具舟楫

又

水杪秋風鳴颯颯環步空亭日千匝忽迂征轡入衡門
共看霜輪上雲葉紫煙收盡擬階升白露溥空欣手接
何須清酌浣枯腸自覺爽氣滋雙頰可憐末路競牛毛
不悟勞生寄蚊睫向非霸處務功成爭得盟時遭智劫
西山君故有風期我亦從今理歸楫

分韻見簡

幽人寄巖谷志士從簪纓所尚初不同出處皆有行夫
子胡為哉飲露食秋英和璧以為質黃鐘以為聲皎皎

文史中久作星斗明一見輒心降端如屈人兵天意亦
可料禍患矧已經豈其禮樂時而不收珪珽故知阿衡
任便是西山清我豈夫子徒猥辱數澤并驅車遠過我
為我開天庭凡今落松塵皆昔所未聆念此坐相阻三
十六峰橫子言不予隨猶得座右銘

與德符仲孺述之宿南堂分得客字

從容白露前轉盼一歲隔念我方促裝夫君復來客踈
簾生晚音霽月澹秋色此會豈易諧未用詢長陌

南堂分韻得秋字

大火不秋駐高堂文字秋青蠅付驅除白日堪遲留雞
癰落新烹瓜壺收輕浮尚有明月在倘能如故不

曾園分韻得得字

藩城富池塘所向輒荆棘天風初轉西朋簪共來北暑
清隨處幽蓮高向人默羣鷗安在哉我今均爾得

再宿南堂分韻得星字

夕雲不成雨冉冉東南征涼月掛河漢鮮風起階庭蛩

韻響新織螢光駛流星誰知亦有念夙駕在青冥

德符
次日

早行

道鄉集卷三

欽定四庫全書

道鄉集卷四

宋 鄒浩 撰

古詩

分韻送德符還山得送字

秋風歛來歸秋事日夕動葉淨嵩嶺高煙空潁川縱茅
齋鬱其傍妙與猿鶴共拂衣問前途不作河濱夢念君
如病松重以旻天慟朱屠朱子龍且集黃公鳳伊予亦
何為於此迭賓送慎勿甘自埋斯文要梁棟

送陳志仁赴河州司理

佳人宰木懸秋月
穉子霏霏灑清血
枯風冷雨暗長天
借使端居亦心折
問君夙駕今何之
萬里關河西復西
西州平昔但聞語
不意黃塵隨綠衣
將軍雅歌飛玉觴
健兒如鼠馬如羊
桁楊生耳卧庭廡
日冀賓僚來畋良
雪霜肅殺百草死
孤峰嫋嫋砂磧光
城頭笳鼓咽初曉
夢破衾裯皆異鄉
情鍾矧復是君輩
只應予稍攢中腸
只應予稍攢中腸
當思大人在高堂

送羅正之為兩浙提刑

滄溟可枯山可移公心獨與天地期
田間經術入州縣所至父老均兒嬉
明明日月照肝膽謂言吾民方阻飢
回車為我作豐歲要令國體無瘡痍
買臣郡去不持節季真逸請非康時
幾年夢想在松檟再拜一觴今得之
鄉人擁路識忠孝雅慰平生良可知
恩光到此何以報行矣二浙如王畿

送裴仲孺為太和尉

時與崔遐紹蘓世美樂文仲王仲弓以故人從此去

為韻分
得去字

波濤幾千里洶洶東南注故人帆北風絕意蛟龍怒孤
州何處城幾盡長江路鴻鴈方來飛霜雪且凝沍夜旦
耳目中動與客心忤况乃青雲姿四十困不遇有室常
罄懸未免折腰去命也天造之智力豈其預端能一判
然楚越猶跬步崖邊晚分携君顏湛如故

送李子威致仕還鄉

人間勲業如作詩先生能詩端自知人間得喪如奕碁

先生能暮復何疑此身未免人間世南北東西聊爾耳
波濤風際湧丘山不害江河為止水今年青春草木青
只有白髮日日新先生一笑謝簪綬歸作三吳高尚人
三吳寒暄幾來去童時問井今猶故問門親舊半成空
徃徃子孫無託處先生第宅瀕清流負郭歲有千鍾收
揮金買酒醉花月一局一篇方外遊諸郎森森美且修
名聲相繼徹冕旒斑衣夙夕奉顏色借問達官誰與儔
他年再拜鄉人後猶能敬為先生壽

送散老歸龍井

長安冥冥砂礫飛道人趺足來何為師恩浹髓未云報
誓求卿相成其碑卿相盈朝成者誰尚書妙墨侍郎詞
二公奔走天下士士獲一面猶幾希道人願力豈不
滿文字乃今兼得之龍井神龍應護持杖頭星斗東南
垂過門別我自色喜我愧儒冠多背師

送榮子邕宰新鄭

子淵陋巷居子真巖下耕窮約一如此不妨道自行矧

君有民社南面恩光榮問學展經濟豈不慰高情爾來
幾薰風許洛猶聲名還將模範心農桑厚羣生行矣興
人歌國僑相弟兄

送鄭州吳綬通直北歸

霜雪下群木江山拱高城曠然爽氣中幅巾日將迎精
神在文史朋舊皆公卿乃於功最時冰泮人間情不待
髭髮改乾坤付柴荆虛舟本無繫風御聊爾行此邦鬱
多賢向來集聰明德翁可君心歸歟助長生

次韻答交代俞樗年教授見簡之什

吾鄉藹多士夫子惟英才妙年雙眸清不為紛華開飛
聲動寰宇著錄爭徘徊論說翕以定端如匡鼎來著鞭
青雲衢飄飄謝塵埃伯鸞賦五噫少陵歌七哀豈比太
平遇得志無疑猜朝綱舉天網陞黜常恢恢胡然落泮
宮猶歎南山臺維今堯舜君側席方虛懷簡拔到寒谷
未始由梯媒懸知器業成指日登蓬萊伊予愧樸樸聿
來托高齋與君出處間一一金石諧峴首鬱蒼莽江流

澹縈迴龍卧縮頭角騰驤埃春雷君車亦難緩行矣明
詔催逸步從此分駕駕安能陪

知府呂大卿餞別樗年以今我來思雨雪載塗
分韻賦詩得雨字

使君出吾鄉門墻掃塵務諸生擁經來翕然影響赴維
時夫子賢獨入青眼顧河南拔賈生千載一高步爾來
十五年終然阻鷁鷺如星不麗天而乃西南雨晚逢使
君車亦復此邦駐從容平生歡萬事散朝露江山飛雪

霜冉冉歲云暮我來踵規模夫子故長路使君有高情
肅以豆觴寓賓僚集清夜健筆落佳句行矣勿稽遲青
雲答知遇

奉和邢舍人寄望之愚溪朝陽巖

冷風不動水無聲倒影冲融漾太清公為少留誰會意
且憑詩句作長城

又

我聞紫微公潤色邁東里道阻未識面馳心極雲駛及

此襄漢遊黃堂見名氏乃知吏民上屹若楚山峙不以
外自殊夙興酬寄委陶瓦煥窮閭長堤矗江涘陋彼繩
墨拘畏首復畏尾坐令焚溺餘衣食就安址流澤配羊
杜如水注無底念茲智略成愚者豈同履胡為愚溪水
嘯咏送寒暑涵萬象幽清絕一塵滓想公溪上心所
得似夫子歲律方崢嶸撫事聊爾耳鼓枻得浮沉觀魚
謝竿餌應憐抑司馬愛身異桐梓

仲益約遊延慶不至作此戲之

出門無他岐一徑指山麓餘寒弄晴陰淅瀝散輕玉我
僕亦賞心我馬亦飛肉回首幕中英文書正拘束

與節推李師益遊谷隱習池

無心一何求無垢一何洗與子入山來放脚東風裏巖
根初著花溪冰半流水一笑真偶然松聲為誰起

謝仲益惠蘭

隣家得蘭惜不得數本分來好顏色兒童見之喜欲顛
驚回午夢松江側起隨斤斲聊齋前面勢欄干相並植

氤氲猶帶鳳山雲，彌天道安端。
我即壁丘亭高秀，谷幽想見僧移動。
晴碧根深叢，迥無他虞青眼東君方着力。
影連桂月共扶疎，香入梅風更引翼。
此心莫逆知誰何，金粟如來在東壁。

次韻和端夫遊谷隱

是日端夫畫大悲像初成設供

我生泉石中，清賞殊不足。
得官漢上來，邂逅亦溪谷。
他時長安塵，用此塵外贖。
城南百餘里，灑落自風俗。
招提密相忘，一一儼西竺。
緬維作者謀，永集荆楚福。
興國最

佳勝千柱列巖屋前疏白馬泉後據白馬麓衲衣擁雲
外拄杖倚藤竹天龍咫尺耳入戶體生粟誰為逢氏迷
不復根也慾落英無再紅秀髮豈常綠共將香火心稽
首千手目老僧獨何為瞬我掣電速已矣勿重言良藥
反成毒

次韻端夫聞江北水磨

萬事根本初難明聲之所發由聲聲不有智者抉其理
直如寶劍埋豐城風生風止孰嘯吸制作解成琴與箏

矧茲江漢漭荆楚含桃初熟飛流鶯波濤暗逐歲月長
激激灘際春雷豁白沙湖邊更湍急五磨因緣資養生
城中鞭驢喘欲死亦或人勞僵自橫借令麥破麴浮玉
青蠅遽集爭營營廼知此策最長利朱墨豈復嗤南榮
天輪地軸馳晝夜彷彿颺扇吹蒼瀛遊江夫人儼然坐
蛟龍不動如石鯨只應神物亦持護我輩何妨雙耳清
送望之移帥荆南

荆湖地與蠻獠通江陵開府節制雄勁兵十萬擁羆虎

鼓角聲動波濤風列城如子滿棊面一一大帥呼吸中
陛下鈎簾撫天宇妙選百辟今屬公楚峰峻拔江漢廣
晴光帶影落渚宮懸知黃馘日飽飯酣歌鼓腹均兒童
裕陵松柏老霜露鍾山杖屨埋蒿蓬自從知己失君相
隼旟熊軾西復東赭袍可想不可見十年一夢朝來空
荊湖雖重豈留處朝廷百度皆元豐

次韵魏道輔教授折梅懷荆帥望之

霜風未放江梅折似向人間作價索冷然一斛冰雪顏

花有天倫此其伯見卯求雞亦非早只今已覺和羹好
殷勤猶是故時香驛路一枝情蓀蓀我公所向物皆春
想見新花如漢濱新花故人政如此欲了此心惟斷輪
送察推賈時以通直郎致仕還荆南

秋聲起庭端索索故時語幾人清鏡中鬢髮默自許東
隣坐長嘆曰此非吾所平生困一官酒若醉醪醕幸今
豁然醒可以事高舉田園熟瓜芋茅茨庇風雨向來避
席人把臂相爾汝年光雖云暮猶足送寒暑斯言不浪

酬即日去幕府我惟塵世浮貴賤等逆旅寬為百年期
形骸一丘土夫君脫身還豈不知所處行矣數珠功青
天走龍虎

戲督潛亭作春羹

先生家中餘玉粒粉以為餅陪春羹春羹品物謝時味
江流暖泛園中英晴窓對案忽舉首徑走長鬚呼友生
襄陽大夫腹如鼎一著九牛猶未盈惓然放筯即過我
自嘆珍庖逾大烹且言初意亦在我屬我府事留西城

先生飯不飯俗客若苦轉眄相倒傾東風雕刻物物好
槎頭縮項尾不賴藥苗蔬甲破土出似與芻豢爭功名
應憐十載瘦藜莧為我一除飢腸鳴

潛亨既見和再作此贈之

不作苟見如君平不以禮屈如樊英廢屣堅卧三十載
凜凜風聲人自傾墻東墻西過高馬往往愧汗面發頰
豈知嗜欲極豺虎白晝擇肉無厭盈有時一飯稔奇禍
他年五鼎還遭烹狡兔未滅黃犬在突兀上蔡空前城

先生謝去既飽德鼓腹之趣終難名更要我輩集匙筯
風雨不變如鷄鳴自憐頭額乏奇表幾與薤鹽同此生
不愁握手遂傾覆只愁未至聞憂美

次韻仲益解嘲

真宰幹萬物物物相乘除童角贖以牙畢竟均有無江
山與絲竹等為薦虛徐江山寂寞生絲竹富貴餘要知
謝安石青史端幾書達人眼目開洞照無親疎安用欣
厭間浪取爾與余獨喜豐蔀幽坐獲驪龍珠

和歐陽彥立再用仲益前韻

山行迹未掃，倏忽歲已除。
東風從東還，天機動群無。
自憐藜藿中，遭時謝嚴徐。
兩曜棲曉端，輝光照三餘。
爾來知昨非，一笑捐詩書。
虛堂自朝夕，與世成濶疎。
胡為公子賢，賓集亦致余。
鳴泉春際飛，聊復觀跳珠。

次韻和知府歐陽叔弼學士禱雨武侯祠

盲風日日吹塵土，謾說有年歌。
自古紛紛機械空，作勞况乃象龍求。
致雨黃堂學士極憂心，忍復賓前事懸堵。

倘助豐穰能出雲境內山川無不舉丞相威靈凜一方
遠矚祠宮途可取旌旗拂曉動長庚彷彿飛雲趨西府
精神洞達金石開此意豫應神已覩况公愛民如愛子
不以斯民供鼎俎居士庵中常默然田里人人自安處
他時刀劍倚市門徃徃買牛耕草莽心絕多岐禮義生
和氣氤氲見眉宇惟天至聰下其耳飽聽歡謠薦佳語
故宜神力導休祥不待牲醪集軒廡胡為風旱久未寧
行矣斗柄將建午豈煩瑞祝更殷勤禱處由來似尼父

三分天下指掌間，顧此提封才一羽。
沛為甘澤定不難，溝澮縱橫互吞吐。
坐令百穀暗郊原，會見腰鎌分勤苦。
儒宮釜魚端欲生，自笑年來遽如許。
雖無高廩並坻京，猶得朝昏鳴食鼓。

時學糧不足方有求府中故云

嘲仲益

春時植蘭甚勤比新東軒遂悉鉏去或者譏笑則曰予將易竹于此作此戲之

低簷廕茅竹，陋如野人居。
夫子莞爾笑曰：此真吾廬庭。
前鬱喬木，庭後猶榛蕪。
芟削隨手淨，春蘭植扶疎。
光影動窓几，馨香襲文書。
皎然紉佩心，邂逅同三閭。
爾來基

構新百事凌往初突兀煥華屋茅竹掃其餘雙楠庭之
珍斬伐殊榮枯要知碧油幢特立當階除念念入勲業
不與蓬蓽俱蘭雖不生門安能逭誅鋤剖琴如剖薪烹
鶴如烹魚珠玉抵飛鳥鑄鐘委洪爐逝矣覆轍存來車
猶此涂尚欲取脩竹永以娛朝晡問竹竹無言冷風一
虛徐

寬夫率同諸公謁大悲寺觀所畫聖像以回向
心地初分韻賦詩得初字

襄州城東十餘里天僊大悲江上居白龍盤伏不敢動
澄波如練風前紆飽聞黔首喜相謂微此妙相吾其魚
鼎來巾屨陪作禮他年假道今題輿毫端願力歛有感
手目縱橫隨卷舒高亭短棹青春裡雲雨曉霽乾坤虛
誰將五色染萬物物物可意難親踈會須指顧發深省
此心長似楚香初

次韻和簽判靳慎微奉議謁武侯祠有作

卧龍得風霆天宇不難肅歷數端何歸轉盼移禍福廟

食凜平生光靈走川陸欲知庇斯人綿延視巫祝

廟祝馬氏

自唐會昌

二年充

戲示柄

汝為獅子時而作獅子吼他年毛骨成一顧百獸走

次韻答詹成老謝密雲龍之什

龍鳳小團分禁戶往往稱珍減前語元豐天子妙風雷
萬古埃塵洒新雨壑源春貢識此心不比豫州常泉紵
卿雲密密擁蜿蜒御府僅能千百數匪頌臺閣裁幾人

恩逐味增淪骨髓帝鄉仙去鼎湖空井閤閤門猶玉乳
龍髯雖在龍莫形只有雲留瑞民伍葉家所得最非常
好事殷勤始容取故人分贈不遐遺憐我哀摧病方瘳
蒲陽英爽香難攀品目縱橫誰扞禦仰惟筆削到茶經
亟以將誠歸許與詩來寒谷歛然春坐覺春光滿永泰
次韻和成老謝何伯震

滄溟倒挽供餅壘少年取醉真豪哉天旋地轉膽如斗
何獨謫仙方逸才爾來意氣折憂患霜雪仍從雙鬢催

吾師吾友得渾沌有口不復輕為開賓筵竟日但趺坐
竦聽搖屏談玉杯中分魯國兩夫子道德未逢賢者哀
黃鍾大呂相應和儒風賴以扶傾頽伊予幸甚獲親炙
獨愧不如匡鼎來

送石師稷還新昌

官失常丁民破產僅有流波入春眼行人不管居人愁
但喜船頭解初綰汀洲夢破白鷗前歸意崢嶸淨如剗
挽君君竟逐風東冥立西樓思何限念君心似嶺雲高

卷雨收雷依巖嵯弟兄元愷正功名獨自巢由謝青簡
君今杖屨煙雲中我憶當年寄蕭散情深人合睂天倫
相與宮商真律管可憐燕越阻尋盟夜壑不留空舊館
只應石佛儼巍巍為我旃檀薦誠款

遊湘西道林寺用沈傳師韻

賜還殊無功可論放逐復向山前奔道人眸子炯如故
邀我累日遊祇園御書新閣揮霄漢祝融嚴拱世所尊
恍然身世脫塵垢矯若鴻鵠辭籠樊是時秋老雨腳斷

晴光萬里凌朝昏北辰直下望天闕紛紛郁郁卿雲屯
綵衣蘭膳奉顏色想見協氣還盈門鴈飛不到竟何許
日異湔雪除癰痕四年之中兩到此易搖難立憐孤根
方寸倏忽叢百感湘源白鶴空盈樽

湘源白鶴乃長沙酒名

道人

顧我亦無語但指幡從風際翻由來否泰反其類况逢
主聖同義軒而今而後戒覆轍長記崇寧初紀元

予以罪貶

實在崇寧改元之歲故有是句

謁女貞何氏祠

正月一日雨不休朝來四望陰雲收衆陽扶導日輪出
輝光倏忽盈九州欣欣草木動新意鸞鳳鼓翅翔天遊
高山託處將半載真人風韻長凝眸精神凜雪亦已久
惟言夙駕南岡頭仙居樓閣拱形象祥煙瑞靄簷間浮
焚香再拜適我願想見王母同優游蟠桃不老春更永
人間變化知幾秋輪囷重蓋擁車馬氣勢赫赫移山丘
萬方有口莫敢議勲勞自以為伊周門墻旦暮祝遐筭
長守富貴無與儔于今掃蕩一何有白楊影裡令人愁

大夫祈嚮乃如此孰為女子能清脩功成直上紫霄去
遺蹤猶向瀟湘留我來不及叩真訣真訣固在冥心求
五行八卦自流轉生天生地生物稠騎龍跨虎越宇宙
豈但洗滌無愆尤他年誰作列仙傳編入高仙吾姓鄒

醉飲

我生不嗜酒斷來仍十年前年竄嶺表去年斥湖邊
欲以禦瘴濕迺復酒至前一杯復一杯朝暮常醺然因
之醉鄉遊別是一山川日月不相促萬物同暄妍眼界

絕塵汙耳根遺俗譚心平氣自和妙與天地全歡糴而
鋪醅信以昔人賢琴外陶靖節詩中李謫仙聲利挽不
回昏昏長醉眠有師誰得之我奉以周旋

謝衡州花光寺仲仁長老寄作鏡湖曹娥墨景

枕屏

道人秀骨生何許若耶溪邊清氣聚不從章甫事功名
遊歷諸方叅佛祖祝融峯下忽擡頭覩破虛空笑而舞
折脚木屐二十年門外草深無寸土偶然消息落人間

挽出花光照今古我舟邂逅泊山前霧捲雲開見眉宇
更知我自浙東來曾擁旌旗塵督府千巖萬壑繞罇罍
夢斷卧龍誰是主為將池墨灑蛟綃故國封疆歸擇取
曹娥江接賀家湖環以峰巒暝烟雨森森喬木動樵風
廟貌崢嶸閔神禹碑留遺刻蔡邕題注目端為楊主簿
子猷興盡季真亡髣髴棹聲迴遠浦乾端坤倪渺莫窮
咫尺并包入庭戶坐令鄉思滿瀟湘恨不歸飛插雙羽
蒼梧洞庭南北中氣象縱橫隨步武祗緣流放阻君親

入眼雖奇若無覩道人方便巧施為乃以家山慰心腑
舊愆猶冀獲消除恩錫餘年返農圃青鞋布襪謝塵埃
肯使高蹤慚杜甫


除名

前年除名竄新州今年除名竄昭州我名無實浪自得
坐此人間多怨讐恩深天地貸斧鉞除之又除名不留
雖然未即聽逐便已覺此身民是儔裂冠毀冕散車馬
幅巾杖屨西南陬行者爭道舍爭席所向爾汝紛應酬

洞山有語久弗契忽然一笑知來由我追我隨非我患
那用避如韓伯休

別零陵

零陵詎中邦道阻五千里我以放逐來本非心樂只身
止高山巔忽忽彌半禩人情久自親况復多可喜坐使
故鄉念如火沃之水罪大不得留今茲動行李昭州雖
嶺南流寓盖均耳倘未還庭闈在彼猶在此胡然當作
離耿耿殊不已物我要兼忘咄哉從此始



道鄉集卷四